



N°600
Entrée le 12.04.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 12.04.2024

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 11/04/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesch fir Gesondheet weiderzeleeden.

Ëmmer nees kënnt et vir, dass Medikamenter an den Aptikte kurzfristeg net méi disponibel sinn an erréicht no e puer Wochen ërem verkaf kënne ginn. Grond dofir kënne Problemer um Niveau vun der Produktioun oder vum Transport sinn, mee awer och d'Kontingéierung vu bestëmmte Medikamenter spillt hei eng Roll.

Vun enger Kontingéierung vun engem Medikament schwätzt een, wann en Hiersteller eng bestëmmten Unzuel un Dose pro Land festleet, déi pro Mount geliwwert dierfe ginn. Wann d'Nofro an engem Land méi héich ass, wéi d'Unzuel u Medikamenter, déi dem Kontingent entsprechend geliwwert dierfe ginn, kënnt et um Enn vum Mount zu Engpäss. Wann e Land säi Kontingent opgebraucht huet, ginn nämlech keng weider Dose geliwwert - an dat och wann den Hiersteller der eigentlech nach op Stock hätt.

D'Kontingéierung baséiert op der Idee, dass all déi beliwwert Länner iwwert dat ganz Joer Medikamenter erhalen an et net an engem Land zu Engpäss kënnt, well an engem aneren ze vill akaf gouf. Wann d'Produktioun vun engem Medikament limitéiert ass, kann eng Kontingéierung also zu enger méi fairer Verdeelung bäidroen. Leider héiert een awer och ëmmer nees vu Medikamenter, deenen hier Distributiounszuelen vum Hiersteller kënschtlesch niddreg gehaale solle ginn, fir Parallelexporter ze verhënneren. An dëse Fäll géif Opgrond vu wirtschaftlechen Interesse manner produzéiert a verkaf ginn, wéi méiglech wier, well d'Hersteller sécher stelle wëllen, dass all Land just grad genuch Medikamenter kritt, fir d'Besoinen vun der Bevëlkerung ze decken, esou dass sech keen Exportmarché entwéckele kann an d'Hersteller d'Kontroll iwwert de gesamte Verkaf behalen.

An deem Zesammenhang wéilt ech der Ministesch dës Froe stellen:

1. Wéi eng Medikamenter, déi a lëtzebuergeschen Apdikten Akaf kënne ginn, si vun enger Kontingéierung betraff?
2. Wéi vill vun dëse Medikamenter konnten an de leschten 12 Méint zu engem gewëssen Zäitpunkt net méi Verkaf ginn, well de Kontingent opgebraucht war?
Op wéi engem Datum waren dës Kontingenter pro Medikament pro Mount jeeeweils erschöpft?
3. An der Äntwert op d'parlamentarescher Fro N°3024 vun 2009 hat d'Regierung gesot, dass et bei



www.piraten.lu

de lëtzebuergesche Verkafszuele wéinst dem verhältnisméisseg klengen Effectif zu prozentual héije Schwankunge kéint kommen, déi dozou féiere géifen, dass d'Zuele vun de d'Kontingentéierungen net ëmmer richteg op de Lëtzebuergesche Marché passen. Wat gouf säitdeem gemaach, fir mat dësem Problem besser ëmzegoen?

4. Wéi eng Beméiungen si geplangt oder goufe vun der Regierung ënnerholl, fir ze verhënneren, dass kontingentéiert Medikamenter temporär an den Apdikten net méi ze kréie sinn?

Mat déiwem Respekt,



CLEMENT Sven
Deputéierten





LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet an sozial Sécherheet op d'parlamentaresch Fro n° 600 vum 12. Abrëll 2024 vum honorabelen Deputéierten Här Sven Clement.

1. Wéi eng Medikamenter, déi a lëtzebuergeschen Apdikten akaf kënnen ginn, si vun enger Kontingentéierung betrafft?

Déi pharmazeutesch Betriber hunn déi legal Obligatioun der Division de la Pharmacie et des Médicaments vun der Gesondheidsdirektioun d'Indisponibilitéit vun engem Medikament, souwéi och d'Ursach dovun matzedeelen. Allerdéngs ginn d'Firmaen d'Kontingentéierung net explizit als Ursach vun enger Indisponibilitéit un. Dowéinst ass et net méiglech Informatiounen zu dësem Thema ze ginn.

D'Kontingentéierung si vu pharmazeutesche Laboratoiren ufanks den 2000er Joren agefouert ginn, mam Zil de Flux vu verschiddene Produkter ze optimiséieren. Bei der Kontingentéierung berechent d'pharmazeutesch Industrie sou genau wéi méiglech d'Produktioun an d'Quantitéit déi an all Land ausgeliewert gëtt, an dat op Basis vum Verlaf vun de leschte Joeren.

2. Wéi vill vun dëse Medikamenter konnten an de leschten 12 Méint zu engem gewëssen Zäitpunkt net méi Verlaf ginn, well de Kontingent opgebraucht war? Op wéi engem Datum waren dës Kontingenter pro Medikament pro Mount jeweils erschöpft?

Aus den Informatiounen déi vun de pharmazeutesche Betriber matgedeelt ginn, ass et net méiglech Konklusiounen ze zéien ob eng Onverfügbarkeet vun engem Medikament op d'Kontingentéierung zeréck ze féieren ass.

3. An der Äntwert op d'parlamentarescher Fro N°3024 vun 2009 hat d'Regierung gesot, dass et bei lëtzebuergesche Verkafszuele wéinst dem verhältnisméisseg klengen Effectif zu prozentual héije Schwankunge kéint kommen, déi dozou féiere géifen, dass d'Zuele vun de d'Kontingentéierungen net ëmmer richteg op de Lëtzebuergesche Marché passen. Wat gouf säitdeem gemaach, fir mat dësem Problem besser ëmzegoen?

Am Joer 2009 waren d'Previsiounen fir d'Verdeelung vun deene verschiddene Produzente baséiert op Daten zum Verlaf vun hire Produkter duerch Grossisten, déi d'Apdikten an de verschiddene Memberstaate beliwieren. Dës europäesch Prognose waren net onbedéngt passend fir e klengen Maart wéi Lëtzebuerg.

Zënterhier ass de Maart gewuess, huet sech erweidert, an d'Datesammlung ass méi präzis ginn. Pharmazeutesch Firmen hunn Zougang zu méi präzisen an zuverlässigen Donnéeën fir hir Fabrikatiouns- a Verkafsprevisiounen ze maachen, besonnesch duerch d'Zréckgräifen op Servicer vu spezialiséierte Firmen, déi "Maartinterpretatiouns- an Datenanalyse-systemer" ubidden, déi op der Kräizung vun Donnéeën baséiert sinn déi am ganze Land gesammelt ginn.

D'Estimatiounen vun de Besoine vu Medikamenter déi op viirechte Vente baséiere ginn awer net duer fir d'Bedierfnesser ze decken am Fall vun aussergewöhnlech héijer Nofro (z.B. saisonal Epidemie déi méi schwéier wéi erwaart ausgefall ass) oder am Fall vun engem Fabrikatiounsproblem (z.B. Mangel u Rohmaterial no engem gréissere Virfall).



Dofir si rezent op europäeschem Niveau verschidden Dispositiver en place gesaat gi fir eventuell Indisponibilitéitsproblemer vu Medikamenter besser ze antizipéieren, onofhängeg vun der Ursach vun der Indisponibilitéit.

4. Wéi eng Beméiungen si geplangt oder goufe vun der Regierung ännerholl, fir ze verhënneren, dass kontingentéiert Medikamenter temporär an den Apdikten net méi ze kréie sinn?

D'Division de la Pharmacie et des Médicaments vun der Gesondheitsdirektioun huet am Januar 2022 e Comité de pilotage an d'Liewe geruff dee sech mat der Ausschaffung vun engem nationale Plang fir d'Gestioun vun den Indisponibilitéite vu Medikamenter an aner Gesondheitsproduits beschäftegt. Ee vun den Aarbechtsgruppe widmet sech dem Thema Kontingentéierung.

Nieft de kommerziellen Iwwerleeunge vun enger Kontingentéierung ass et wichteg fir sech mat allen Acteuren aus dem Circuit vun der Medikamenteverdeelung auszetauschen, fir d'Disponibilitéit vu kritesche Medikamenter ze garantéieren.

Lëtzebuerg, den 23. Mee 2024

D'Ministesch fir Gesondheet
a sozial Sécherheet

(s.) Martine Deprez